

DALIL TENTANG TURUNNYA NABI ISA A.S DI AKHIR ZAMAN

1. Firman Allah ;

[[Sesungguhnya dia (Nabi Isa a.s) adalah tanda kepada Kiamat]] *Az-Zukhruf : 61*

2. Firman Allah ;

[[Sesungguhnya tiada dari kalangan Ahli Kitab melainkan akan beriman dengannya (Nabi Isa a.s) sebelum matinya, dan pada hari Kiamat dia akan menjadi saksi kepada mereka]] *An-Nisaa : 159*

3. Dari Abi Hurairah r.a, sabda Rasulullah s.a.w :

((Demi jiwaku yang berada dalam genggamannya, **sangat hampir akan turun di kalangan kamu (Isa) ibni Maryam** sebagai seorang pemimpin yang adil, lalu dia akan mematahkan salib, membunuh khinzir, menghapuskan jizyah, tidak akan (Nabi Isa) menerimanya dari kalangan orang kafir dan akan melimpahnya harta sehingga tiada seorang pun yang menerimanya sehingga satu sujud (di waktu itu) lebih baik dari dunia dan seluruh isinya)) (*Riwayat Bukhari dan Muslim*)

BEBERAPA SIFAT NABI ISA

1. Dari Jabir bin Abdillah r.a sesungguhnya Rasulullah s.a.w bersabda : ((Dihadapkan kepadaku para nabi... dan aku melihat kepada Isa bin Maryam, lalu aku dapati orang yang paling hampir menyerupainya ialah **Urwah bin Mas'ud**) (*Riwayat Muslim*)

2. Dari Abi Hurairah r.a sesungguhnya Rasulullah s.a.w bersabda : ((Para nabi itu adik-beradik berlainan ibu, ibu-ibu mereka ramai tapi agama mereka satu, sesungguhnya aku yang paling berhak dengan (nabi) Isa bin Maryam kerana sesungguhnya tiada di antaraku dan dia nabi (yang lain), dan sesungguhnya dia akan turun, apabila kamu melihatnya maka kenalilah dia ; **seorang lelaki yang tegap (tidak terlalu rendah dan tidak terlalu tinggi), antara kemerahan dan putih (kulitnya), dia memakai dua helai baju yang berwarna sedikit kekuningan, seakan-akan menitis dari rambutnya air walaupun tidak basah...**) (*Riwayat Ahmad dan Abu Daud*)

TEMPAT TURUNNYA NABI ISA A.S

Dari Nawwas bin Sam'an r.a Rasulullah s.a.w bersabda : ((Ketika demikian (Dajjal sedang berkuasa), lalu Allah utuskan Isa bin Maryam **maka dia akan turun di sebuah menara putih di timur Damsyik** di antara dua helai baju berwarna kekuningan dalam keadaan meletakkan kedua tapak tangannya di atas sayap dua malaikat, apabila dia menganggukkan kepalanya menitis air darinya dan apabila dia mengangkatnya gugur air seakan-akan mutiara, maka tiada seorang kafir pun yang dapat mencium nafasnya melainkan akan mati dan nafasnya (Nabi Isa) berakhir sejauh pandangannya...) (*Riwayat Muslim*)